



Khutba Jummah

HADHRAT MUHYI-UD-DIN AL-KHALIFATULLAH

Munir Ahmad Azim

05 Mai 2017

(08 Shabaan 1438 AH)

Après ki li fine salué tous so bane disciples (et tous bane musulmans) dans le monde entier avec la salutation de paix dans l'Islam, Hazrat Muhyi-ud-Din Al-Khalifatullah (atba) fine lire Tashahhud, Ta'uz, et Surah Al Fatiha, et li fine ensuite axé so Khutba Jummah lor « Insaan & So Bien Être »:

Normalement *Insaan* (dimoune) li bizin so bien être. Et *Insaan* pas capave gagne so bien être par li-même. Même ene léroi aussi pas capave gagne so bien être par li-même. Li pas vine léroi par li-même. Li vine léroi par dimoune. Si péna dimoune même, bé ki léroi li pou faire? Au contraire, ene léroi li pli bizin dimoune pour so bien être. Ene dimoune dans l'Afrique ou dans la brousse li pou capave débrouille so la vie mais pas ene léroi. Si li arrivé débrouille so la vie aussi, li pou réussi faire li avec beaucoup difficultés.

Donc, ene léroi li pli bizin lézot pour so bien être ki ene dimoune ordinaire. Et ene dimoune ordinaire li pli bizin lézot ki ene dernier dimoune misère. Sa veut dire ki dans sa *duniya* (lémonde temporaire) là, pour nous gagne nous bien être, nous bizin les autres. A coze sa nous trouver ki dimoune en général, li cherche recours à bane moyen ki capave ranne li confortable. Si li pé gagne faim et soif, li alle rode manger et boire. Si li péna kass (l'argent), li alle guette dimoune ki ena kass. Si li pé être dominé à coze ki li tousel, li alle guette bane ki capave secours li. Si li malade, li alle rode médecin et li prend médicament.

Tout sa bane moyens ki ene dimoune li essaye attrapé pour ranne li confortable, c'est bane moyens pli fragile ki ena sa. Et sa bane moyens là zot pli fragile ki ene la caze z'araignée aussi, si péna la main Allah Ta'ala là-dans. C'est Allah Ta'ala même ki faire difé brûler, ki faire couteau coupé. De l'eau li dans contrôle Allah Ta'ala même. Kan Allah Ta'ala oulé, la pluie tombé. C'est par l'ordre Allah Ta'ala même ki nous gagne la sècheresse et cyclone. Et parfois la pluie tombé mais nous pas trouve l'effet ki nous pé attane. C'est Allah Ta'ala même ki donne guérison. Ene dimoune li capave gagne so guérison par ene simple la tisane kot ene lot pas capave gagne guérison excepté dans bane médicaments ki coûte li par milliers de roupies. Ene dimoune li capave pas gagne sommeil dans so la caze ki bien climatisé lor ene lili confortable tandis ki ene dernier dimoune misère lors roche, lor la paille ou lor ene simple lili casse-cassé aussi li commence ronflé couma li poze so la tête.

Donc, tout bane moyens ki ena pour rode le bien être dans sa *duniya* là, li pas pour efficace aussi lontan ki Allah Ta'ala pas oulé. À coze sa Allah Ta'ala pé dire dans sa verset Quran là:

"L'exemple de bane ki fine alle cherche protecteur ailleurs apart Allah li couma dire ene z'araignée ki fine natte ene la caze. Certainement la caze pli fragile, c'est bien la caze z'araignée, si seulement zot ti capave réaliser!" (Al-Ankabout 29: 42).

Allah Ta'ala pé montrer le point ki bizin saizi, c'est ki nannié pas capave représente nannié malgré ki li capave paraite efficace, si Allah Ta'ala pas oulé. Ene dimoune li alle cachiette dans ene forteresse bien équipé. D'après l'apparence, sa dimoune là fine fini gagne so sécurité. Mais si Allah Ta'ala pas oulé, sa forteresse là aussi na pas pour représente plisse ki ene la caze z'araignée.

Nous guette certain pays dans le monde ki fine arrive dans le passé, saki pé passer et aussi saki pou ena dans le future. Dans l'espace quelques secondes même Allah Ta'ala fine faire zot (et pou fer zot) retourne en arrière malgré ki zot ti paraite puissant. Nous capave ena tout bane moyens mondains. Dans nous guetté li paraite bien efficace et bien sophistiqué mais kan Allah Ta'ala décider, tout sa là zot pas représente plisse ki ene la caze z'araignée. Et sa aussi c'est nek ene comparaison pour nous gagne ene l'idée. En vérité li pas représente nannié même sa. Nous guette l'ironie de sa kitchose là. Li extra fragile mais kan Allah Ta'ala oulé, li extra fragile mais kan Allah Ta'ala oulé, li servi saki pli fragile pour détruire saki pli puissant. Allah Ta'ala pas bizin bel bel kitchose. Allah Ta'ala ena capacité mette tout kitchose enba là-haut couma Li ena la capacité garde tout kitchose en l'ordre.

Allah Ta'ala fine servi *Tayran Ababeel* (bane zoiseaux de différents espèces en grand nombre/ group) pour détruire bane éléphants et l'armée de Abraha. Nous ki nous ti pou penser? Sa bane roches ki sa bane zoiseaux là fine lancer pas efficace sa? Bizin ena pli gros roches? Mais Allah Ta'ala pas bizin sa aussi Li. Li fer ce qu'Il veut. Li capave servi ene ti zaffaire pou détruire ene saki pli gros et fort. Lot côté Allah Ta'ala fine servi sa même la caze ki pli fragile pou protèze Nabi Kareem (saws) kan Nabi Kareem (saws) ti quitte Makkah pour alle Madina ensam avec Hazrat Abu Bakr (ra).

D'abord li fine cachiette dans ene la cave (*Thawr*). Couma zot fine rentrer, Allah Ta'ala fine faire l'arrangement. Li fine faire ene z'araignée natte so la caze zis dans l'entré de sa la cave là. Après ene pigeon fine vini et fine ponne deux dizef. Tout kitchoses fragile là-dans. Bane *Kafir* (infidèles) fine vine là-bas et ene fine envie guette endans. Tellement la caze z'araignée là ti pé paraite vieux ki so camarade fine dire li: "*To la tête bon? Ki to pé rodé là-dans? To pas trouver ki ena ene la caze z'araignée ki paraite fine natté avant naissance même de Muhammad (c'est-à-dire, Nabi Kareem (saws))?* Et lor là ene pigeon fine ponne deux dizef là-dans. Sa zoiseau là li farouche et li pas reste kot ena dimounes."

En vérité, pareil couma Allah dire dans Quran, personne pas conne Allah So bane soldats excepter Li-même. Nous ena ene grand trésor dans nous la main. Et sa c'est sa croyance ferme dans capacité et *Qudrat* (décret) d'Allah Ta'ala. Ene dimoune si li envie gagne succès et protection, alor li bizin vine vers Allah Ta'ala. Et tourne lé dos avec Allah Ta'ala, c'est ene moyen pour ranne nous situation pli fragile ki ene la caze z'araignée couma Allah Ta'ala Li-même fine mentionner dans sa *ayat* (verset) là.

Ki Allah aide nous par So toute puissance et nous bizin réaliser ki avant tout, nous tout sans exception nous bizin Allah. Ene dimoune pas capave dire li pas bizin Allah, li pas bizin Bondié. Si arriver li dire sa, li ene dimoune ruiné. Nous bien être fondamentale li trouve dans Allah, dans servi So cause et faire Li plaisir, et Insha-Allah, pareil couma Nabi Kareem (saws), la caze z'araignée pou vine nous la force et non nous faiblesse, parski nous ena Allah avec nous. *Insha-Allah, Ameen.*